

Na osnovu člana 19. stav 2. tačka 10. i čl. 35. do 37. Statuta Saveza općina i gradova Federacije Bosne i Hercegovine, Skupština Saveza općina i gradova Federacije BiH na sjednici održanoj 22.03.2007. godine u Gradačcu, donosi

ODLUKU O NADLEŽNOSTIMA, NAČINU RADA I SASTAVU SKUPŠTINSKIH KOMISIJA SAVEZA

Član 1.

Ovom Odlukom uređuju se nadležnosti, način rada i sastav skupštinskih Komisija osnovanih na Skupštini Saveza 22.03.2007. godine u Gradačcu.

Član 2.

Komisije Skupštine Saveza su:

1. Komisija za razvoj i unapređenje lokalne samouprave;
2. Komisija za ustavna i zakonodavna pitanja;
3. Komisija za međunarodne veze i saradnju;
4. Komisija za prostorno uređenje, stambeno – komunalne djelatnosti i zaštitu životnog okoliša;
5. Komisija za ekonomski razvoj općina i gradova;
6. Komisija za izbor i imenovanja.

Član 3.

Komisija za razvoj i unapređenje lokalne samouprave: razmatra aktuelna pitanja koja se odnose na razvoj lokalnih demokratija u općini i gradu, unapređuje i razvija demokratske procese, te radi na jačanju i osposobljavanju lokalnih vlasti za odgovorno upravljanje i vođenje javnih poslova od interesa za lokalno stanovništvo, realizuje utvrđene političke i demokratske zahtjeve Vijeće Evrope za decentralizaciju vlasti sve do lokalnog nivoa, razmatra i razvija upravnu strukturu lokalnih zajednica u okviru povjerenih izvornih nadležnosti, podstiče inicijative za konstituiranje izvornih prihoda za nadležnosti za koje nije osigurano finansiranje od strane federalnih i kantonalnih vlasti, unapređuje aktivnosti na uspostavljanju decentralizacije fiskalne politike, razvija institute pravne zaštite lokalnih vlasti i prava na poštivanje lokalne samouprave, prati realizaciju zaključaka i zahtjeva Kongresa CLRAE Vijeća Evrope.

Član 4.

Komisija za ustavna i zakonodavna pitanja: razmatra i priprema odgovarajuće inicijative za ustavnu i zakonodavnu dogradnju sistema lokalne samouprave, priprema prijedloge za ustavne amandmane kojim se utvrđuju kompetencije lokalnih vlasti, i za uspostavljanje gradova kao posebnih urbanih, upravnih i duhovnih centara, stara se za ostvarivanje prava na zaštitu sistema lokalnih vlasti i poštivanje lokalne samouprave, učestvuje u kreiranju fiskalne politike i reforme poreznog sistema, te na ostvarivanju položaja i učešća Saveza općina i gradova FBiH u kreiranju unutarnje politike i u pripremanju zakona koji se tiču lokalnih vlasti.

Član 5.

Komisija za međunarodne veze i saradnju: razmatra pitanja iz domena međunarodne saradnje općina i gradova – uspostavljanje i jačanje saradnje sa asocijacijama lokalnih vlasti susjednih zemalja, podstiče projekt saradnje i partnerstva između općina i gradova i Federaciji sa gradovima iz Evrope, ostvaruje saradnju sa ambasadama lokalnih demokratija uspostavljenih na području Bosne i Hercegovine, unapređuje i razvija saradnju sa organizacijama lokalnih zajednica, podstiče ekonomski i kulturni razvoj i interes Federacije BiH kroz sudjelovanje u programu i projektu regionalnog Saveza Mreže za jugoistočnu Evropu, te razvija saradnju sa asocijacijom lokalnih vlasti Republike Srpske u zajedničkom nastupu u okviru Koordinacionog tijela Saveza općina i gradova Bosne i Hercegovine.

Član 6.

Komisija za prostorno uređenje, stambeno-komunalne djelatnosti i zaštitu životnog okoliša: razmatra aktuelna pitanja iz nadležnosti lokalnih zajednica u domenu urbanizma, prostornog uređenja, komunalne infrastrukture i stambene politike, priprema i predlaže odgovarajuća rješenja za funkcioniranje komunalne infrastrukture, jačanje sposobnosti lokalnih vlasti za investicijsku rekonstrukciju i izgradnju komunalne infrastrukture, priprema odgovarajuća rješenja za zakonske projekte u oblasti prostornog uređenja i urbanističke politike u cilju jačanja sposobnosti općinskih vlasti da samostalno regulišu i upravljaju javnim poslovima koji su od interesa za lokalno stanovništvo, prati i izučava oblast stambene problematike, te osigurava primjenu jedinstvene politike u procesu projekta privatizacije, a posebno u domenu legislative o prodaji stanova na kojima postoji stanarsko pravo.

Član 7.

Komisija za ekonomski razvoj općina i gradova: prati i razvija neophodnu kulturu poduzetništva na lokalnom nivou, izgradnju kapaciteta u poslovnom upravljanju i ekonomskom razvitku, razmatra promjene režima oporezivanja i uvođenje stimulativnog poreznog sistema, podstiče zapošljavanje u okviru privatnog sektora, s ciljem unapređenja privatnog poduzetništva kao sposobnog i aktivnog učesnika u finansijskim i ekonomskim tokovima u zemlji, unapređuje razvoj i uvezivanje malih preduzeća, posebno radi na koncepciji novog poreznog sistema i zakonskih olakšica i drugih uslova (poslovni prostor, potrošačka politika, snabdijevanje i turizam), razvija aktivnosti u poboljšavanju i implementaciji politike jednakih mogućnosti za sve, prati i razmatra propise iz domena poduzetništva i ekonomije.

Član 8.

Komisija za izbor i imenovanje: na osnovu prikupljenih prijedloga od strane članica Saveza, utvrđuje prijedlog odluka o imenovanju odnosno razrješenju članova stalnih radnih tijela, Nadzornog odbora te povremenih radnih tijela.

Član 9.

Svaka Komisija ima predsjednika i devet (9) članova.
Mandat predsjednika i članova Komisije traje četiri (4) godine.

Član 10.

Skupštinska komisija radi na sjednici.

Komisija u svom radu donosi stavove, mišljenja, prijedloge, sugestije, organizuje stručne skupove i savjetovanja.

Predsjednik komisije saziva sjednice komisije po vlastitoj inicijativi ili na prijedlog Predsjednika Predsjedništva.

Predsjednika komisije u slučaju odsutnosti ili spriječenosti zamjenjuje zamjenik predsjednika koji je i odgovorna osoba za pripremu i organizovanje sjednice odbora.

Skupštinska komisija po potrebi može imenovati i sekretara komisije.

Stručna služba Saveza stara se za rad i vršenje poslova i zadataka skupštinske komisije.

Član 11.

Skupštinske komisije o svojim stavovima i mišljenjima iz pojedinih oblasti života i rada lokalnih demokratija podnose izvještaje i prijedloge Skupštini i Predsjedništvu Saveza.

Član 12.

Sjednice komisija se u pravilu održavaju u prostorijama Saveza općina i gradova Federacije BiH.

Član 13.

Stručna služba Saveza stara se za rad i izvršenje poslova i zadataka skupštinskih komisija.

Član 14.

Ova Odluka stupa na snagu danom donošenja, a objavit će se u „Službenim novinama Federacije BiH“.

Član 15.

Stupanjem na snagu ove Odluke prestaje da važi Odluka o nadležnostima, načinu rada i sastavu skupštinskih Odbora („Službene novine Federacije BiH“, broj 50/02).

Predsjedavajući Skupštine Saveza

Ferhat Mustafić, s.r.